

NO SOALAN :100

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. DR. ONG KIAN MING
(SERDANG)**

PERTANYAAN : LISAN

TARIKH : 27.07.2017

Y.B. DR. ONG KIAN MING [SERDANG] minta **MENTERI KEWANGAN** menyatakan sama ada projek kereta api elektrik ECRL adalah 'projek satu landasan yang dibina di atas formasi landasan berkembar' dan sama ada 'Environmental Impact Assessment' (EIA) telah diluluskan.

JAWAPAN

Tuan Yang di-Pertua,

Untuk makluman Yang Berhormat, Projek Laluan Rel Pantai Timur (ECRL) yang bakal memulakan pembinaannya pada tahun 2017 dan dijangka siap sepenuhnya pada akhir suku kedua tahun 2024

merupakan projek keretapi elektrik yang membabitkan pembinaan landasan tunggal di atas formasi atau susunan tapak landasan berkembar (*single track on double track formation*). Keseluruhan landasan sepanjang 600.3km akan dibina menepati rekabentuk landasan berkembar namun hanya satu landasan akan disiapkan menjelang 2024. Pembinaan landasan kedua akan disiapkan bersesuaian dengan peningkatan permintaan perkhidmatan ECRL pada masa akan datang.

Selaku pemilik projek ECRL, pihak Malaysia Rail Link Sdn Bhd (MRL) yang merupakan anak syarikat milik penuh Menteri Kewangan Diperbadankan sentiasa memastikan semua terma dan syarat termasuk elemen yang melibatkan impak terhadap alam sekitar dipatuhi sepenuhnya. Bagi makluman Yang Berhormat, projek ini telah menerima kelulusan *Environmental Impact Assessment* (EIA) daripada Jabatan Alam Sekitar pada 20 Jun 2017.

Tuan Yang di-Pertua,

Pelaksanaan projek ECRL dijangka memberi kesan limpahan ekonomi (*economic spillover effects*) yang besar kepada negara dan rakyat, terutamanya bagi masyarakat di wilayah Pantai Timur.

Sehubungan itu, pihak Kerajaan berserta MRL amat komited bagi memastikan projek mega ini dapat dilaksanakan mengikut jadual, kemas dan teratur.

SOALAN (101)

PEMBERITAHUAN PERTANYAAN
DEWAN RAKYAT, MALAYSIA

PERTANYAAN : LISAN
TARIKH : 27 JULAI 2017 [KHAMIS]
DARIPADA : DATO' DR. NIK MAZIAN BIN NIK MOHAMAD
[PASIR PUTEH]

SOALAN :-

Dato' Dr. Nik Mazian Bin Nik Mohamad [Pasir Puteh] minta Menteri Kesejahteraan Bandar, Perumahan dan Kerajaan Tempatan menyatakan kesan yang akan berlaku terhadap kesihatan rakyat terhadap masalah sampah-sampah yang berselerakan dan apakah peranan Kerajaan khususnya Kementerian Kesihatan untuk membantu permasalahan yang berkaitan sampah-sampah ini. Masalah pembersihan sampah-sampah yang melimpah-limpah di musim perayaan amatlah tidak memuaskan, adakah pengurusan sisa-sisa pepejal di bawah pengurusan syarikat swasta lebih baik daripada pihak berkuasa tempatan (PBT).

JAWAPAN :-

Tuan Yang di-Pertua,

Untuk makluman Ahli Yang Berhormat, Kementerian Kesejahteraan Bandar, Perumahan dan Kerajaan Tempatan (KPKT) sentiasa memandang serius berhubung isu kebersihan di kawasan bandar dan perumahan yang boleh membawa risiko penyakit dan menjejaskan alam sekitar. Pembuangan sampah terutamanya sisa makanan di merata-rata tempat oleh orang awam boleh menggalakkan pembiakan dan menarik perhatian haiwan perosak terutamanya tikus. Kehadiran haiwan perosak ini boleh menyebabkan pencemaran air dan kawasan persekitarannya dengan air kencing tikus terinfeksi dengan bakteria *Leptospira*. Leptospirosis merupakan isu kesihatan awam yang berpunca dari sikap dan mentaliti orang awam kerana ia merupakan penyakit yang berhubungkait dengan amalan kebersihan diri dan kebersihan persekitaran. Penyakit leptospirosis adalah disebabkan pendedahan kepada air, makanan atau tanah yang telah dicemari oleh air kencing tikus terinfeksi.

Selain itu, faktor persekitaran yang tidak bersih dan longgokkan sampah akan menyebabkan sesebuah tempat itu berpotensi untuk menakung air dan boleh menyebabkan ia menjadi tempat pembiakan nyamuk. Antara wabak penyakit yang berpunca dari bawaan nyamuk ialah Malaria, *Filariasis* (penyakit untut), demam denggi, deman denggi berdarah, deman kuning, *Japanese Encephalitis* (JE) dan demam Zika. Wabak penyakit ini mudah merebak dan boleh mendatangkan maut dalam masa yang singkat selepas ia dijangkiti.

Oleh yang demikian, langkah yang proaktif telah diambil bagi mengelakkan berlaku masalah yang boleh menjejaskan kelancaran operasi kutipan sisa pepejal semasa musim perayaan baru-baru ini melalui pelaksanaan beberapa pelan tindakan bagi negeri-negeri yang menerimapakai Akta 672 iaitu Wilayah Persekutuan Kuala Lumpur dan Putrajaya, Johor, Melaka, Negeri Sembilan, Pahang, Kedah dan Perlis. Pelan tindakan yang telah dilaksanakan tersebut adalah seperti berikut:

- a) Penyediaan jadual khas dengan penambahan frekuensi kutipan sisa pepejal dan dilaksanakan sekurang-kurangnya 3 hari sebelum hari perayaan iaitu pada setiap malam dan berterusan sehingga 3 hari selepas perayaan;

- b) Syarikat konsesi mengenalpasti lokasi *hotspot* yang akan berlakunya limpahan sisa pepejal dengan membekalkan tong berpusat di kawasan tersebut. Frekuensi kutipan dilaksanakan di kawasan *hotspot* dengan sekurang-kurangnya kutipan sebanyak 3 kali sehari;
- c) Menjalankan kaedah "Spot n Clear" bagi kutipan sisa pukal dan sisa kebun di tong berpusat. Syarikat konsesi melaksanakan operasi kutipan sisa pepejal dengan segera tanpa menunggu sisa pepejal dikumpulkan dalam tempoh yang lebih lama. Kaedah ini dijalankan seminggu sebelum dan selepas musim perayaan;
- d) Menjalankan "Spring Cleaning" seminggu sebelum perayaan bagi pembersihan pasar yang menjadi tempat tumpuan orang ramai; dan
- e) Pembersihan di bazaar Ramadan dan Aidilfitri dijalankan dengan segera sebaik sahaja tamat tempoh perniagaan oleh para peniaga.

Selain itu juga, sepanjang musim perayaan yang lalu, sekiranya terdapat sebarang masalah berkaitan kutipan sisa pepejal, orang awam boleh menyalurkan aduan menerusi talian bebas tol 1-800-88-7472 yang

beroperasi pada jam 8.00 pagi sehingga 8.00 malam pada setiap hari termasuk hujung minggu.

Secara umumnya, negeri-negeri yang menggunakan Akta 672 telah disalurkan dengan kualiti perkhidmatan pengurusan sisa pepejal yang standard, cekap dan seragam melalui penggunaan *Standard Operating Procedure* (SOP) dan Petunjuk Prestasi Utama (KPI) yang lebih menyeluruh seiring dengan keperluan masyarakat. Manakala bagi negeri-negeri yang tidak menerimapakai Akta 672, pengurusan sisa pepejal dan pembersihan awam diuruskan oleh Pihak Berkuasa Tempatan masing-masing.

Kementerian Kesejahteraan Bandar,
Perumahan dan Kerajaan Tempatan

Julai 2017